

四庫全書

集部

欽定四庫全書

湯子遺書卷十

工部尚書湯斌撰

詩

詠史

崑崙有瑤樹丹鳳翔其杪
朝餐玄圃露暮宿星辰表
皓月滿晴空羽翮何縹緲
我愛徐孺子清脩自皎皎
韜精在南郡高卧白雲曉
羣賢方碌碌誰能測渺杳
郭泰獎人倫申屠耽林沼
浩然凌雲姿豈復虞繒繳

夏日詠懷

初夏朝氣清綠陰映竹閣好鳥時來集微風散林薄
養疴豐暇日坐臥對雲壑圖書紛几席茗椀常間錯
偶爾屬篇章怡情志簡畧採藥支短筇尋泉踏芒屨
豈曰謝浮榮明志貴澹泊世人逐妄跡真源誰啟鑰
柱史崇虛無金仙戒執著大道本淵微會心在寂寞
矜智適成愚要旨何由度鬱鬱南澗松百丈巖如削
遙望浮雲中縹緲飛白鶴於斯悟至理俯仰增遼廓

金陵別姜西溟

憶昨桂發時遇子梁谿上攜手遊名園登高共眺賞我行
到白門夜月苦懷想落葉禪房寂忽聞扣門響相見各歡
然秉燭對書幌高樓恣嘯詠古道互推獎鍾阜鬱嵯峨秦
淮平如掌信美非吾鄉茲晨理歸槳送我大江濱悲歌何
慨慷世事本浮雲素心貴不爽願言各努力庶足慰吾黨

題張鞠存見示鄉賢合祀傳

昔明神廟時海內正清宴學術半瞿曇文章競藻綯淮上

有張公莪莪邦之彥早年登朝著舍香侍紫殿典禮佐秩
宗矯矯人爭羨抗疏定皇儲慷慨淚如霰藩封宗派清文
體為一變權貴咸側目拂袖歸鄉縣卧看東山雲丹鉛手不
倦再世得農部家學源流行經術接曲江五車皆貫穿姓
字重賢書才華一時擅對策繼董賈當宁數稱善正值國
步艱中原日飛箭誰為籌軍需飽騰資酣戰辛苦期報國
家憂謝甲唅墨線更登陴江淮明組練至今鄉閭間童髦
頌德徧俎豆並黌宮春秋報祀延今子當朝傑偕余南宮

薦聯轡趨金闕情懷自繾綣相對二十年尺素無由轉奉
詔徵文學公名如雷電更有嗣君賢綵筆益葱蒨聯篇
復累軸字字重黃絹父子登蒲輪史冊亦罕見余也樗
散姿甘老農圃賤濫竽何慚惶待放歸耕便相見叙闊
蹤示我鄉賢傳再邦仰遺徽偉績何能撰他年過淮上
芳樽或可奠

送黃俞邵聞訃南歸

揮淚向河梁燕山暮凝雪握手送君歸欲語聲嗚咽定

交十載餘千里音書闊今夏再相遇一見驚華髮君家
書盈屋石倉未足埒縹緗充畫棟一一為我揭編目近
七萬真贗俱能別太母年最高賢明女中傑喜君有良
朋美酒為我設時余憇僧廬往來無間缺攜書上小舟
高吟青谿月樓頭相顧笑笙簫為暫歇是時有明詔徵
聘到巖穴使者頻至門敦趨日彌切同人相勸駕君懷
獨愜愜向余垂涕言老母年將耄捧檄雖有心中情難
委決惟母察其情治裝勿使輟讀書逢

聖主致身貴蚤達何況旁求殷乃自甘汨沒我力尚未
衰猶可自存活君聞母訓言躊躇未忍發遲迴復浹旬
母意終難越予久卧烟蘿才力最薄劣

盛朝廣摻羅亦預徵書未先後至京師相期砥素節君
丈高揚馬聲名動朝列上卿求識面招邀多賢哲一日
過余邴顏色暗如鐵云具陳情章未得達

天闕出稿以相示一字一泣血三日不相見麻衣腰垂
經乃是凶問來長號肝腸裂唁賻自元宰走帛冠裳白

余感賢母德淚下不能竭憶昔十年時君表我母烈大
筆真如椽幽冥亦感徹我抱終天恨較君更慘絕今日
送君歸巖飈正凜冽瘦影何蕭條黯淡桑乾陌努力慎
自愛宗祊一身子母志終當酬母使性空滅遙望石城
雲愁閣為君結

賦得黃花晚節香

秋氣凜凜露為霜獨見孤英帶晚涼絳葉飄零依碧澗
參差鴻雁滿寒塘碧澗寒塘憶昔日芳枝葳蕤金莖密

雲錦高張霞霧舉遊絲搖曳花欲語過眼繁華曾幾時
百卉具腓今何許寒圃蕭條秋風淒玉蘂繁香踈逕齊
自有高松同晚歲還須竹影倚清畦獨立秋光甘自媚
安能鬪彩桃李蹊況得長近幽人屋霜根冷枝結幽獨
君不見梧桐百丈宿鸞鳳金井葉飄空碌碌

送陳別駕

自余結茆東澗側往來車蓋不相識使君下馬入深林
高譚蘿薜為生色大幅長篇掛素壁鄰翁相見各自失

平生性僻耽丘壑十年未履郡齋闕知君為政最風流
雪苑桑麻清露濕忽傳使君聞雙詎遠近父老淚沾臆
云昔板輿迎養時菜衣進酒樂何極高堂忽動粉榆念
萬里舟車隨不得馬嘶嶺上白雲曉帆落江邊村樹黑
此時海內尚昇平遊子南望情嘿嘿一旦烽火照三山
關河咫尺分南北梁園闕海春復秋夢想何由生羽翼
今年銀漢洗甲兵家書繞到顏如墨淚灑庭梧枝盡枯
童叟赴喧路途塞更聞羣鳥百千翎統署哀鳴聲不息

古來至孝格天人冬筍江魚紀史筆眼見此事最分明
一時賦詠傾鄉國我聞此言歎且泣送君南陌百端集
吳江水碧越山青一路望君情惻惻

長安春日行

錦繡山河千里壯龍文氣結九重開流雲遲日春光暖
御柳搖颺傷露臺京都自昔稱佳麗城中半是王侯第
峻閣重樓夾道懸雲房霧宇相虧蔽上林更接西山色
峰疊翠黛烟凝濕朝霞片片藹燕闕照耀金莖淑氣入

九陌三條香雲起萬戶千門春色裏雕楹銀榜映花紅
光射御溝爛若綺是時

至尊坐玉清柏梁賦罷奏咸英爐煙縹緲鸞旂動晨旭
黃扉瑞靄平詞臣侍從承清宴珥筆數上南薰殿下直
從容歸鳳池傳呼應制文章善只今海內正消兵滇池
劍閣掃欃槍壯士不賦從軍樂野老惟聞布穀聲

聖人制作追謨誥一朝寮友似嚶鳴微臣竊幸逢景運
願作衢謠隨玉笙

送富雲麓請假歸閩

我昔退耕在南畝先生聞望齊北斗千里贈言古道存
朝夕奉持如璫玖重到承明又幾年追隨劍珮良非偶
朝罷同看太液雲五更聽漏闕門久容臺政簡畫多閒
一卷青編常在手探道欲過羲皇前論詩不作風雅後

聖朝禮樂繼唐虞夙夜寅清功不朽月明紫帽動歸心
忍上離亭為折柳闔海迢迢萬里餘勸君更進燕山酒
至尊稽古資元臣肯使山中遺壽考願公且莫戀雲松

經綸黃閣誰當右倘過清溪遇李膺

謂厚菴先生

為問可御

蒲輪否

汪鈍翁六十初度

先生家鄰具區澤萬頃琉璃界天白異書捫腹五千卷
海內共推文章伯六經同異識指歸妙義微言恣探索
往余卧病睢陽城南望茂苑風生腋同時應

名到京華旅舍蕭條數晨夕史局編摩一載餘接膝談
讌魯莫逆共抽金匱論興衰獨秉霜毫判心迹扶風筆

削詎專長龍門述作無殊格先生體貌清且癯雙瞳剪
水神奕奕閉戶文成三百篇一朝紙貴長安陌塵埃難
嬰曠士懷片帆歸向五湖宅幾回延竚想瑤華路遠何
由生羽翮昨年奉使過浙西迴艫暫作姑蘇客先生高
臥聞我來披衣攜手話疇昔月出三更虎阜曉睥睨千
秋興莫釋扁舟送我上河梁風苦霜清歎睽隔雲山有
約計難成惆悵高天空跼踖頭白汗青杳無期浮生浪
度竟何益聞君甲子正月初周山中樂事良不易雨後寒

烟拂釣竿花時芳草侵遊屐河豚欲上紫魚肥子弟門
生環講席我欲從之路阻修側身一望吳江碧

順治九年七月二十日

上駕親出郊外諭遣定遠大將軍敬謹親王及諸將南

征應制

壬辰七月
御試

聖主崇文德宗臣事遠征偃戈誠

廟算勤武豈

皇情為廣薰風化仍期瀚海平曉雲隨

鳳輦秋月近

龍旌湛露分
丹禁彤弓錫
漢京投醪

御酒徹緝袞軍容清
湘野懷征旆滄波待洗兵
應聞旄羽至率舞拜干城

中秋蘿翁齋中讌集

僻巷逢迎少
惟君得數過
爽秋今正半
高友意如何
卜宅門相望
論文興不磨
開樽臨紫桂
解帶掛青蘿
洗硯索新賦
分題和舊歌
隔離見怪石
轉逕踏深莎
樹杪宿

鴉動燈前墜葉多
舉頭看素魄
回盼失銀河
銅漏還傳箭
金烏漸耀波
百年日日醉
莫自歎蹉跎

省耕

夏甸傳遊豫
虞廷重省方
恤農煩儆戒
任土定輸將
往牒休堪著

興時道自長
親推迴黛耜
祈穀卜年芳
鸞輅垂春發
鳳旂拂曙張
屬車連迥陌
羽葆度橫塘
郡吏迎僊仗
遂師覲衮裳
風吹桃葉嫩
雲罩麥畦涼
曲水滌軒蓋
晴林駐

鸛鶴咨詢保介切申勸耔耘忙

聖澤霑原隰龐眉樂

帝鄉寶岐舍雨翠高穗映霞黃帳殿看馴雉平田認遠
楊實函欣亞旅蔀屋富倉箱無逸成

天德思艱邁古皇寬徭恩屢紀賜復史難詳

國步登淳古民風躋壽昌舜絃聞愠解堯酒醉衢康共
識氤氳氣永覘歲德祥幽風今繼響奕葉頌無疆

應詔

御試恭紀四十韻

虞帝闢門日鎬京訪洛年夔龍賡喜起畢散接班聯號
令多師古聲華重集賢縹緗充

玉几冠珮秩

經筵天錫圖書秘春呈雲漢鮮體仁功自懋建極道無
前制作開三統清寧撫五絃詩歌諧雅頌翰藻麗山川
游衍懷明旦絲綸動象躔鴻儒聚白虎侍史撤金蓮棧
樸功施久鈞陶禮樂全旁招窮海滙顓俊及林泉薦引

寧論地吹噓不計員公孤方拜讓臺諫復駢肩岳牧搜
揚切宰衡啟事連雲巖鶴詔促谷口蒲輪遄緯度占文
耀風雷起蟄淵渥洼空駿馬湘沚絕蘅荃盛舉超曩代
曠逢豈偶緣自當謹舞蹈何敢尚迓邇者碩推轅固妙
齡儷仲宣朔南咸至止仕隱各無偏爭著京都賦競裁
羽獵篇月分漕輓米日費水衡錢魚媿馮諷食金羞郭
隗先霽陽當禁苑芳樹映華旃典禮

臨軒重工寮將事虔瓊階聞曉奏綵仗遶爐煙五字英

才著一經舊學傳文成獻

黼幄賦就立花磚東壁霞光燦少微淑氣纏

龍顏常自喜鳳扇欲徐還不數瀛洲宴儼如紫素旋同
聲稱飲溼野老羨登仙才豈馬卿亞虔承孝武憐

兩朝感際遇一志矢貞堅謳咏休明瑞祈瞻歷數延得
賢摛漢頌大寶續唐編遜志期宗傳健行望體乾昭回
垂萬禩奕葉奉堯天

院中宿直八韻

清切推丹地，瞻依近紫宸。
龍池鐘漏晚，鳳沼月華新。
古水流霜影，宮雲澹玉津。

聖皇開治象，元化正含淳。
幸備班行後，叨承異數頻。
端貞期拜獻，樛散愧冠紳。
年老才將盡，憂多道轉親。
夜深星斗闊，始悟與天隣。

送林玉巖奉使琉球十二韻

水國藩封遠，儒臣星使遙。
鸞章頒絳闕，麟繡下青霄。
嶺路秋花麗，閩山宿霧消。
前驅陳玉節，負弩簇金鑣。
到海

風常正開帆浪不驕扶桑看湧日蜃市障迴潮島嶼疑
神岳京華認斗杓鮫人迎上客卉服護仙槎博望通殊
域陸生重漢朝文章堪喻蜀干羽足征苗不數樓船績
寧煩銅柱標歸來王會日拜手聽簫韶

中秋陸處實同年留飲齋中和吳見末韻二首

相對話平生開樽聽雨聲客中途令節林下見交情白
社風原古柴桑世不爭從來樂志者非是愛逃名

別墅仍留憩竹林笑語聲兒童知客意鷗鷺識秋情天

肯容吾懶拙能免世爭他年重過訪不必更通名

寄示兒溥二首

浪跡真無計門庭汝暫持雨多憐稼候地下慮牆危官
稅完應早鄉租催漫遲近聞文體變前輩法須知

汝祖墳前樹今年看幾回叔賢書共讀弟幼酒同杯藥
裹宜常曬柴扉莫亂開初冬當返棹候我竹林隈

西湖聽莊蝶庵彈琴

繫纜孤山下石床理素琴嵐光千嶂滿松影六橋深古

調傳天籟清弦寄道心曲終人亦靜明月照幽襟

送陳別駕之南陽

送客宛中去行吟驛路紆浮雲高密宅古木武侯廬
險隘商顏近士風京洛如此鄉兵火後邑井半邱墟

家居感懷

四首

濫綴

先朝供奉班平明珥筆侍

龍顏辟雍進講華旃細籍畝親推黛耜旋南國遠道璠

海貢西羌不閉玉門關
滄江白髮

君門遠悵望高天未可攀

巖關鎖鑰設咸東指顧河山百二雄
華嶽峻嶒高漢苑
渭川波浪注秦宮
旌旗閃日貌貅靜冠蓋連雲蜀道通
自是太平多暇日
書生何以答

皇功

蕭條僕馬南安署日倚江樓眺碧岑
瘴嶺朝昏雲似墨
蠻村草木桂成林
歸鄉幸慰趨庭志
臥病終違報

主心一葉扁舟還載石片帆風正自長吟

城隅小築避風塵三逕茅齋可寄身藥餌關心朋舊少
青緇滿架校讎新傍松疊石平如案裛露看花折贈鄰
崖岸年來消滅盡莊生齊物不須陳

立春

冬晴正覺日霜靜風轉俄驚節序新倚檻臘梅香欲盡
隔溪官柳翠先勻時艱可信滄洲穩老去方知古道真
擬待東林鶯語細莫辭華髮醉芳春

春霽友人以詩相投書此謝之

春霽園林暖尚遙
石欄殘雪未全消
同人詞賦相投贈
把卷吟哦慰寂寥
箕斗浮名終是幻
巢由高枕不須招
眼看藥笋沿溪綠
岸幘披襟酒一瓢

春日即事

次信菴韻

杜門久矣謝繁華
不道春光取次奢
柳市煙籠舍宿雨
桃村日照散明霞
舊歲禳帖時開玩
新註茶經可共誇
迸笋當階礙杖屨
茅軒小逕不妨斜

春日感懷兼呈仲方

漫說登臨春事饒，衡門兩版閉清宵。
頻聞白帝烽烟暗，苦憶朱方鼓角遙。
憂世何妨同濁醉，畏人真欲混漁樵。
袁安小閣知鄰近，箬笠往還不待招。

崇禎壬午闖寇破寧陵，文學翟先生仗節死之。
今督學使採輿論祀之。鄉賢余感其事，聊述
短章紀之。

成仁本屬中庸事，落落乾坤有幾人。
天以三綱作砥柱，

士將一死答君親理無兩路須求是節到當頭要認真
我至沙隨弔往烈泮宮俎豆肅冠紳

新秋雨後抑莊西齋讌集

雨歇林溪煙未收凭欄雲物見新秋葉心葉熟紅將綻
階面苔深翠欲流碁局頻移竹映榻酒壺好待月登樓
惟君最愛清狂客塵世何人識醉遊

京口贈友人

結宇三江紫岫間薜蘿遠蹙俯澄灣陸機文賦年方少

陶亮間情興未慳花滿芳樽留素月
牕明綵筆照青山
把君一卷吟蕭寺
夜雨孤燈好閉關

錫山別賀天士

浪跡湖山求友聲
文章惟爾重西京
一時贈縞多名士
千里傳書動上卿
對酒方驚秋葉晚
登舟已掛片帆輕
莫愁別後雲鴻闊
梁苑吳江月共明

東林寺 二首

疎雨松林白鶴棲
遠公精舍一峯西
青楓雲鎖談經洞

碧水蓮開送客溪，法相仍傳阿育記。
殘碑猶是晉人題，石欄把酒懷元亮。
烟遠柴桑望欲迷。

參差石勢抱禪扉，萬仞羣峯帶落暉。
碧澗淙泓數磬響，白雲縹緲一僧歸。
閒從苔壁識殘榴，靜愛風泉坐釣磯。
五老青牛烟嶂外，明年策杖莫相違。

戊午應

名入都留別里中親友 二首

蕭然蘿薜絕雙魚，雲外忽傳有鶴書。
學道原因息嗣早。

出山翻悔避名疎幽花谷口遙相映野鷺溪邊迴自如
龍尾班行真濟濟拙庸應許歸茅廬

簇簇郊闕擁畫輪臨河握手話酸辛藝花選石多同調
待漏鳴珂少故人倦鳥寧能歷遠岫歸雲何意覆通津入
朝倘得辭簪紱春水還期理釣綸

長垣北十里學堂岡有夫子廟相傳四賢言志

處

廟內有党懷英篆
書杏壇二大字

柳陌乍隨岡勢轉杏壇忽倚柏林開轍環魯衛行將老

道繼唐虞志未灰
蚪蚪文銷存履屐
犧尊歲久剝雲雷
階前風雨傳松籟
疑是瑟聲入座來

送李子德奉

旨歸養

二首

薊門疎雨淡秋陰
惟爾斯行重古今
賦就上林纔賜第
表陳東掖蚤抽簪
闕河落照鄉山迴
驛路鳴蟬野樹深
到日高堂應戲綵
御香未散遠衣襟

史才經術在關中

詔領羣儒集漢宮瞻望白雲子舍在拜違黃闕

主恩隆比鄰載酒東臯子

山史先生

戴笠譚詩角里翁

亭林先生

回首應憐同調客編摩寂寞老揚雄

辛酉二月初侍

講筵紀事

二首

文華春殿旭光濃

帝簡儒臣侍九重紫禁天章詞煥爛紅雲寶幄語從容
細旃風定牙籤啟袞袖香飄玉珮從典學千秋際

聖主微臣何以稱遭逢

御氣氤氳繞

玉皇西清霞彩映

龍裳經陳謨典

天心正學闡勳華

帝道昌敢向

盛朝稱管晏何須文藻繼班揚恩深覆載安能報誦讀

衡茅志未忘

擬

上賜大臣遊溫泉詩 四首

山陵疊翠倚層霄，瑞靄晴臨碧澗遙。
石上泉聲隨玉漏，巖邊樹色映金鑣。
雲峯遠結盤龍氣，瀑水近當踞虎橋。
一奉恩榮歌鶴燕，長從仙蹕聽簫韶。

碧潭波遶翠微迴，帳殿紅雲覆綠苔。
閼苑烟深朝絳節，華清春曉對蓬萊。
山光獻壽天杯永，寶翰騰輝

御榜開萬國，共瞻隆孝治。
漫言驪阜重，仙臺

傍巖依山敞離宮

詔賜恩波卿貳同閣道周迴香溜裏衣冠趨步彩雲中
不須雕斲傷元化惟有真淳表

聖功何事露臺誦漢主萬年儉德仰

皇風

薊北烟壑俯大溪甘泉春色接丹梯曉來嵐氣當牕入
雨過花光拂座低搖曳霓旌依碣轉參差豹尾與雲齊
願將景物同民樂薄海烝生望紫泥

人日

椒花彩勝懶隨人，閉戶攤書笑此身。
白首校文嘗午夜

寒天點易及霜晨，節遲

時未立春

郊柳應含凍雪少，村梅可

放春稍待西山芳草綠，招邀朋輩醉芳辰。

題畫

秋林不厭靜，高士自能閒。
鎮日茅亭下，閑窓對遠山。

西來庵題壁

禪門深鎖萬松間，江上白雲自往還。
雨過捲簾無餘事

一編周易對焦山

西來庵贈水齋上人

上人舊為寧夏總兵

白馬西來掃野雲
居人誰識舊將軍
楞嚴讀罷焚香坐
一鉢江泉到夜分

戲贈

飯辦松花艾辦衣
同羣鷗鳥渾忘機
駝岡不減柴桑社
擬剪蓬茅待汝歸

贈懷慶太守

二首

野王山路曉雲橫一水滌迴繞郡清兩岸柳條凝露濕
年年常見使君情

西門古廟鄴城陰父老笙簫直到今見說行山青似黛
濟源爭比濁漳深

詩餘

賀新郎 秋思

雨脚纔收了竹簾開梧桐墜露淡烟如掃一派秋聲吹
木末況漸蘋衰楓老問今歲秋光多少貫酒東臯凝望

眼看浮雲變幻入林縟思疇昔紫懷抱空江採得蓴
絲好擢輕舸遙峰隱約放歌霞表世事渾同蕉鹿夢擬
向華胥醉倒更說甚桃花源杳白恰青鞵尋釣侶待月
生一笛驚鷗鳥悲歡話付溪草

滿江紅

後池秋葉蓮
盛開漫賦

藕葉鋪池連陰雨溪流青漲東里叟扶筇還問後渠無
恙隨地菰蒲雙鷺宿垂楊半掩波紋上碧烟開映曉弄
新妝輕盈狀廬山社幽情漾湓浦岸清風宕似層層

紅艷美人堪餉月下時聞芳露滴呼兒學作漁郎唱夢
醒來十里野塘中遙相望

千秋歲

八月十六
日夜玩月

暮霞成綺又送水輪起花影裊簾波細輕清河漢色珍
重嫦娥意今歲好今宵賒取明年醉玉笛情堪寄雲
母屏還倚瓜再削盃重洗紅牙翻舊譜妙舞風吹袂澄
露滴盈階桂落天如水

滿庭芳

秋日閑居

雲澹霜洲鴈飛葭浦兩行烟樹柴門紙窓茅屋秋氣映
朝暎壯歲歸田作賦十餘載高臥邱園漁樵伴時來問
訊紅葉認山村 漫論古今事柴桑谷口往跡猶存但
茶香竹裏酒沸松根午榻清眠夢覺看籬畔菊蕊堪殮
凭欄坐南華一卷朗咏到黃昏



湯子遺書卷十

欽定四庫全書

集部

湯子遺書附錄

詳校官檢討臣劉錫五

助教臣常循覆勘

總校官進士臣繆琪

校對官中書臣王鍾泰

謄錄監生臣張鱗

欽定四庫全書

湯子遺書附錄

行畧

子湯溥等述

先考諱斌字孔伯號荆峴一號潛菴先世為滁州之
來安人始祖諱寬從明太祖起兵積功至廣東神電
衛世襲百戶子諱銘調中都金川門百戶再傳諱庠
以功陞睢陽衛前所世襲千戶遂家焉三傳諱英襲
衛職四傳諱卿以平巨寇王堂功陞世襲本衛指揮

僉事累功至驃騎將軍中都正留守五傳諱易以功
至明威將軍陝西岷州衛守備是為府君之高祖子
三次諱希范以貢生任山西趙城縣縣丞是為府君
之曾祖子諱敏為州庠生即府君祖也孝友寬仁於
兄弟族人篤愛無間言與人終身無忤色又嘗以千
金赴楚為趙城公購棺木比至歲大饑遂傾囊賑之
再往始獲木焉子四人我祖其季也祖諱契庠生慷
慨明達凡大義所關介然不撓鄉黨間每有所疑或

地方大事就正者輒片言立決府君既貴惟諄諄以忠孝相勉勵

誥封中憲大夫陝西按察司副使凡三為鄉飲正賓崇祀鄉賢子二長即先府君府君自幼不好嬉戲八九歲時耆儒王先生慕祥開塾講小學人皆憚其嚴正府君獨侍坐終日無倦容歸即見諸行事遇貴胄輿馬赫奕者泊然不以動念王先生嘗謂先大父曰令子真大器也為制舉義嘗不起草宿儒多遜不能及

平日讀書外無他嗜家貧常借人書篝火讀達旦率
以為常年十六就傅北郭外李自成寇睢城府君聞
變奔還城已閉乃繞濠痛哭先大父及先大母趙恭
人遣人從城上語使去府君不忍遠違伏近郭外斷
蓬坑中時州守遁民開門納賊先大父負曾祖母而
逃府君聞賊入城冒難奔赴至則先大母已罵賊膺
刃歿矣府君號泣不欲生絕食者六日先大父強之
乃食既殯隨大父避難河北舌耕以養既而伯祖賁

皇公卒衢州有弱息留衢大父率府君往欲攜之歸而李自成破北京乃寓衢讀書山中每念先大母苦節恐不聞於世益自刻苦嘗中夜大哭哭已復讀夜深虎羣嘯林外與書聲相間久之山中民皆感動時時來餽燈油米食府君却不受日焚敗葉繼尋飲泉水咽糠粃而已尋至南京以流寓應試七試皆冠軍已而有令納軍需數兩方許入庠遂棄去乙酉

王師定中原乃由江西沅鄱陽歸丙戌補弟子員戊子

舉於鄉己丑會試中式壬辰成進士

世祖章皇帝親試擬

御製大清會典序及送敬謹親王南征詩改弘文院庶
吉士邸舍不蔽風雨閉門讀書不妄交遊甲午授國
史院檢討學士山陰胡公兆龍欲屈致一見終不宥
往乙未

詔選翰林科道出任監司府君名在選中有品行清端
才猷瞻裕之

諭以應得職銜加一級用明年補潼關道副使潼關自
明季亂後民多逃散城中不滿三百家是時

天兵下黔者屯成都漢中而經畧洪公屯湖南征調轉
輸之衆必經其地官吏科斂以辦軍需驛遞重困府
君戒屬吏曰毋科取民財毋妄用驛夫兵來吾自應
之自是大兵將至府君使人迓之境外與申約束曰
部文所需有不給者公請劾我若於額外動民間一
草我亦當論公是後兵至肅然無敢犯者屬吏皆兢

金...
附錄
兢奉法撫勞備至再閱歲闕城中流民歸者數千戶
府君見鄉大夫惟問民疾苦及興革事宜有某公比
日三謁無所言府君甚異之後聞其甥與人爭產欲
為私請既見終不敢出口也行保甲有盜即獲自是
四境宴然又惠民風强悍為設學講律有兄弟相訟
者府君收其詞不問令於講鄉約時必至凡三至涕
泣自陳悔過遂出詞還之卒相友愛府君去時猶追
送數百里也順治十四年恭遇

覃恩階中憲大夫封先大父如其官贈先大母恭人府君心稍慰戊戌撫軍陳公薦於

朝時在任未三年民愛之如父母偶因勘荒行屬邑遇雨止大樹下既去民以朱欄護樹時人比之甘棠云已亥陞嶺北道叅政轄贛南二府為治一如潼關時甫三月清積案八百餘件贛據四省上游地大山深亘稱巖疆有李玉廷者為明舊將以本部萬人入山為盜府君過南昌巡撫張公屬之曰贛寇非君莫辦

勅撫惟所為府君至以手書諭之遂許降約入山自
招之未及期七日而海寇犯江寧報至府君夜見贛
撫蘇公請檄將士嚴城守且曰玉廷許降非心服也
今必變矣某勅文當駐南安南安無兵必先被寇請
往夜馳至郡設守甫畢而寇果至見有備驚走曰湯
公預料如此何可當也遂散兵焚掠府君與撫軍密
計擒玉廷其弟秀廷以衆降當玉廷之初叛也邸報
斷者九日人情洶洶訛言江寧失守蘇公將調兵防

灘府君策海寇陸戰必敗訛言必玉廷為之欲分我
兵力耳蘓公遽起執府君手曰公言是也會捕得海
寇諜者蘇公以屬府君一問即承撫軍曰此當繫獄
候

旨府君曰今人心搖動請

旨往返萬里脫有變奈何遂即斬以

聞數日報至海寇敗又平南王旗軍孫大市馬過南安
殺二人其帥董遊擊誣被殺者以盜問官僅擬鬪殺

律平南王怒曰所殺者盜也當勿論切責南安守及
推官皆錯愕不敢問乃援

赦例以請時府君初受事白撫按曰勢相敵者謂之鬪
孫大持刃在營身無寸傷而民以兵死擬鬪不當乞
自審一訊得實大止殺一人其一乃陳報國殺也遂
坐大斬而申請平南索報國回稱報國攻文村死矣
然大竟抵罪一時旗軍畏服無敢犯者先是府君由潼
關移任便道省親值先大父病血痢欲留養例不可

抵任時遂憂思致疾會軍興力疾視事賊平具呈乞
歸督撫按皆難之駁再四府君狀報曰某母趙氏壬
午殉難最慘已負終天之恨赴任時歸省某父抱病
馬首南馳方寸已亂留之終無益於地方且老父聞
某病病必劇是某貽悞巖疆不可為臣病貽親憂不
可為子也巡按見之惻然乃代請

子告時年三十三矣是行也不孝溥方九歲與母俱未
從先府君攜二僕往返八千里平盜患有馬一匹歸

時鬻之充資斧百姓扶持相送莫不歎息泣下甚有
痛哭者歸侍先大父色養備至繼大母軒愛府君如
已出府君竭誠盡孝亦無異所生每日暮先大父遣
就寢猶讀書至夜分不輟後課不孝溥等亦然曰吾
非望汝蚤貴少年兒宜使苦苦則志定將來不至失
足也授四書外授尚書已授昌黎文百篇漸及史漢
先儒諸書最後課舉子業曰汝將來長成吾未必及
教汝先畧讀諸書知大義庶無廢業嗚呼府君之為

不孝等遠慮如此今追憶之其何能不仰天長號耶
居之西百步為先大母趙恭人祠每朔望謁家廟畢
必至祠肅拜數十年如一日甲辰先大父卒府君哀
毀骨立席藁柩窆晨夕號慟既葬數日一省視墓樹
數百株一枝損必欵斂不置每遇先大父大母忌辰
輒素服終日色慘然不樂即至起官後亦題別主自
隨雖事至叢劇不廢展謁為幼叔延師教誨冀其成
立曰以竟吾父未竟之志也嘗受業孫鍾元先生之

門先生亟稱之作詩以贈行居家閉門郡守罕識其
面今浙江巡撫金公鉉與府君同年壬子任河南布
政使相別二十年見郡守問府君對言睢州未聞有
此人也金公以是益重之會

上諭舉外官告病者州守程公以名聞金公力主之府
君以母老懇辭者三事乃已乙卯

上諭舉賢才赴軍前大學士熊公賜履詢之魏公象樞
曰吾曩見某文久欲薦之然未謀面魏公曰此山中

學道人也舉之誠當顧其家貧甚不能治裝奈何遂
止戊午

詔舉博學鴻儒於是魏公金公交章共薦郡縣迫之行
乃駕牛車入都止僧舍中日杜門危坐未嘗輕謁顯
達既試

上親第為甲等部議以原官脩明史

上命補翰林得侍講編纂日無暇晷為明太祖本紀四
卷列傳十餘卷辛酉充

日講起居注官尋轉侍讀典浙江試所得皆孤寒士
雖下第者皆嘖嘖稱道事竣即行撫軍李公本嚴留
之終不可壬戌充明史總裁癸亥五月始日值

講筵纂脩

兩朝聖訓五鼓入

朝講畢侍

起居歸則裁定明史成厯法天文志及英景憲孝四朝
列傳考訂期於確核時方酷暑汗流浹背不懈也每

日暮正襟端坐潛思經義以備詰朝進講不孝溥請
稍息府君不聽曰此

君命也是年歷左右庶子嘗侍立

上顧問汝平日有詩文乎其繕寫以進歸寓朝服手書
越日即呈

御覽

上召至乾清宮語良久始出嘗

恩賜緞紗先捧至大父主前再拜仍寄大母以榮

君賜甲子超擢內閣學士兼禮部侍郎在閣凡四月公事
外未嘗與大學士接語會江寧巡撫缺廷推孫公在豐
上特擢授陸辭

上深加獎諭

賜鞍馬一綵緞十白金五百兩此行又入見

上撤御饌賜之復

賜御書三軸曰今當遠離展此如對朕也時

上將南巡乃星馳赴任受事後文案山積數日即迎

駕北去乃就舟中批發晝夜不假寐者六日既見

上於淮安城南

上顧問慰藉備至遂前驅至蘇蘇城道極狹制府將毀
舍廣馳道府君曰如此則數萬人無所安息非

聖天子問民疾苦意遽下令止其事

上至府君扈

蹕至江寧

上再賜御書一軸蟒裘一襲羊酒珍羞回

鑿日傳

旨令徑歸署時蘇松賦重積逋相仍官不滿三歲輒罷以故皆不自愛而私規近利上官陰持其短索賂益急虧庫金繫獄者累累富商大賈聚處都市以侈靡相競男婦冶遊巫覡奉妖祠飾怪惑衆民日趨奸利訟師主誣詞興獄輕猾少年懷刃嘯呼主打降畧識字則造淫詞邪說或結旗丁為主契券以奪平民或盤據各官署舞文法累世相承以擅利淮揚十年昏

塾民不聊生號稱難治府君至則進州縣吏謂若等
以金事上官本為巧宦計今官斯土者既絕意陞遷
尚何復冀而以庫金媚人顧汝等或為所脅今與若
更始苟稱職吾力或能拔汝即不能以考成罷歸猶
得守墳墓樂餘年奈何日坐堂皇引前官妻子勘產
顧反蹈所為皆頓首涕泣曰公活我又戒司道府官
不得責屬吏餽皆指天自誓曰謹從公令於是除耗
羨嚴私派清漕弊省獄訟汰蠹役杜請托行保甲革

鹽商匣費一切皆以身先數月劾其不奉令者已又
劾其陽奉而陰違者於是屬吏爭自濯磨制府以下
相戒不受撫屬一錢奉使京朝官迅棹疾過地方官
未嘗餽斗米吏治大清府君愛民出於誠為政以寬
民力卹疾苦興教化培植根本為務嘗請改並徵積
逋為分年帶徵免十八十九兩年災欠減賦額寬考
成豁逃丁調驛困免蘆課買銅除邳州版荒捐明神
宗朝所加九釐餉前後疏數十上部議或從或否而

府君未嘗以數為嫌聞有災傷輒通夜不寐疏立拜
發初至報睢寧沭陽邳州災蠲賦數千兩又報泰州
災并蠲前二年賦且入永蠲案內次年淮揚徐大水
奏報免賦十餘萬兩又盡免高郵寶應等州縣賦復
幾十餘萬發常平倉粟及丐將軍提鎮權闕輸粟往
賑又檄布政司以庫銀五萬兩告糴江西湖廣先發
後

聞或以為不可府君曰候

昔然後告糶民皆溝中骨矣吾寧先發金脫格部議以
所糶平糶足償庫何患乃遂遣兩府同知往誠曰若
至極陳淮揚災狀言米斗一金購及半運還俟後令
已而大賈爭集淮揚斗米百錢而已後嚮米償庫

國帑無損而民賴以活者數十萬有司請報湖蕩蓮
芟府君駁還曰朝廷任土作貢未聞問諸水濱老吏
叩頭以例請府君曰例自人作寬一分則民受一分
之賜且蓮芟歲或不熟一報部即為永額後欲去之

豈可得乎又禁冶遊崇儉約驅優伶懲豪猾淫詞邪
說馬弔博具一切皆絕又禁有喪者不得火化及久
不葬比一歲報葬者三萬餘棺有五通神者江以南
崇奉數百年禍福立應歲娶民間子女為婦所娶婦
皆立死遠近奔走如鶩督撫初至謁畢然後受事府
君取其像投太湖中民大駭已而妖遂絕廣立義倉
社學聚生徒講孝經小學月吉講

上諭律令民間凡所為稍不法者輒恐府君知風俗大

變時民見吏胥皆奉法惟謹權貴絕口不敢請託而
民用日省乃因府君姓為諧語曰黃連半夏人參湯
也又以自奉儉約謂之豆腐湯云吳縣監生王某者
文恪公裔也有奴竊貲逃數年矣突引弓刀數十騎
來自稱鸞身親王府詬罵索金錢官吏莫敢呵問以
告府君立收送獄中論如法又常熟縣奴某持其主
之父國初受隆武劄迫主遠出欲據有主婦府君廉
知大怒曰國家屢更大赦此草昧時事何足問而豪

奴以脅若主乎拘到追劄付火斃之杖下百姓莫不稱快時海禁初開浙江提督請遣將巡海中捕盜

詔下四省議府君議曰盜聚然後加兵今兵加何所而輕遣將徒使寇掠海中為買賣患久之必成畏途今當靜以待動無為事先督撫多如府君言議上遂止故事印官委署由布政使擬送頗有用賄得者府君謂未任而先有所費何以責廉今掣籤如選例或請府君講學府君曰盡吾職即學也今人以講學釣名

隲本業而長奔競吾未見其可也或請為府君立書院府君曰吾不講學安有書院比者功令禁生祠所在稱構書院籍斂父老財飾偽長奸吾甚不取乃下令嚴禁吳有隱士徐枋者居西山下四十年人罕得見府君重其品節欲因以勵頽俗嘗屏騶從造其門枋終不肯出久之府君乃去時人兩高之夏月蜚盛從質庫贖敝苧帳以自覆錫山泉名天下府君竟任未嘗酌杯水朔望謁廟屬吏至不敢代市辦香署中

秉燭治事夜四鼓始假寐日中始食自此心血枯槁
嘗顧謂溥曰古人云食少事多豈能久乎已而曰

君命即天命也一歲嘗四至淮上冬夜乘小漁舟渡江
幾覆非風凜冽背痛者數日歸值歲終封印猶晝夜
拮据見屬吏必反覆丁寧告以

君恩不可負民命不可殘諄諄如家人父子一時政績
卓然而府君意猶未愜蓋經營厝設十未竟二三且
曰吾自信者心耳安能保其必當乎時一切當奏聞

者皆有期會過則奪俸江蘇所屬非至豐沛千二百里兼按察司在江寧相去復五百餘里殺人及盜質審動輒逾限故往日事非不得已不奏府君曰是欺也且奸盜復何畏乎乃悉具奏雖罹罰不恤然每奏罰輒荷

恩破格寬免府君之初受事也值蠲漕四分之一既而請分年帶徵或以為柄臣功先後索金四十萬府君禁使勿與屬吏以民願輸告曰公不應仇公必甚府

君曰民有錢寧不以輸國賦而入私門乎吾寧旦暮
斥罷歸田畝誠不忍見若等剝民媚權貴也將按發
窮其事屬吏叩頭謝罪良久乃已當是時天下爭輦
金錢入都而府君屬無一人往者屢有求皆不行乙丑
秋戶部因奏銷劾府君吏部奏奪俸六月
上復特免比大計藩臬空手入都都門索府君一刺不
可得莫不竊恨然以

上知府君深無如何也丙寅春

皇太子將出閣

上諭吏部自古帝王諭教太子必簡和平謹恪之臣統領官寮專資贊導江寧巡撫湯斌在講筵時素行勤慎朕所稔知及簡任巡撫以來潔已率屬實心任事允宜拔擢大用風示有位特授禮部尚書掌管詹事府事聞

召即議行蘇城罷市十餘日外郡之民亦接踵至日聚轅門外號泣伺府君出羣擁馬首甚欲閉城填巷又

設數匱斂錢為路費將叩

閣一日匱遽滿府君曰

詔旨寧可違乎委曲宣諭乃得行及行送者十餘萬人
自蘇至六合不絕於道府君念大母年老乃便歸省
視會

皇太子出閣屆期兼程北來既見

上

上喜甚問路所由具對因奏鳳陽災狀且言徐州雖已

荷

恩蠲賦比入春尚苦饑

上遽遣官往賑活者無算

上問下河事下河者本減出河中水由高堰漕隄諸壩
入高郵寶應興化泰州泰興山陽邳州沭陽等州縣
田廬皆沒

上諭開渠入海以居黃河下故謂之下河初安徽按察
使于公成龍督理下河估金八十萬兩時于受總河

節制以圖議上而總河靳公輔駁其議曰吾以勾股法測潮高內水五尺河開必內灌法當築丈五尺隄起高堰屬之海盡收各壩水入隄東高丈餘則潮不入而隄外可盡為平田須運土三百里外築圍水中洄取圍中土築隄非三百萬兩不可隄成墾洄地為田鬻之民以償庫

詔靳于廷議未決於是

上遣工部尚書薩公穆哈侍郎穆公成格會漕運總督

江蘇巡撫詢問民情民畏靳公多言願罷工者府君曰是不可罷也上水日增而下無所洩不十年無淮揚矣靳徒以海內灌故異議海可內灌寧俟今日且吳淞錢塘皆有潮何獨淮揚而慮內灌乎今兩府蠲災外賦不滿三十萬不若請盡乞民令有司督民自開河薩曰公言良是第奉

詔問民䟽中又可入公語耶某見

上當面奏矣及見遂不奏至是府君具對如前語

上詰問薩等辭服皆革職自是忌者衆矣是時于已擢直隸巡撫乃更用工部侍郎孫公在豐往督之孫至言開河三便旬日下河水驟長疏鑿難施

上召靳公至

面諭塞河南岸及高堰壩靳堅不肯從曰壩塞隄必潰府君力爭

殿上已又及九卿爭午門外凡兩日絀其議竟閉減水壩一年時

上特命府君行坐講禮尋充

經筵講官未幾復總裁明史已更兼詹事官與會議屢蒙

垂問

恩禮殊異人固忌府君且大用而府君所執又數與要人忤因共謀誣府君誹謗構陷百端一時仰其權勢貪其賄遺者皆從而揚其波賴

上聖明終不信也丁卯五月因旱

上使內閣聚問九卿興革事宜府君請復夏秋兩稅及
罷蘆課買銅曰春種未布而責民輸賦比糶盡一歲
之入以償債且不足以故凶歲多逃亡逋賦豐歲亦
不能有所儲蓄曩者國用不足取濟一時今

內帑充積如山何不復夏秋兩稅使勤農者有所積
雖水旱不為災不國民兩利乎至若蘆課新例並令
買銅銅非市所常有權關終歲專購猶患缺額奈何
責職民事者辨此此不科取均貼必責成蘆戶不若

仍聽輸銀便時戶部某公遽起曰公休矣即欲變此
法俟某去戶部乃可今不能也遂罷會會五官靈臺
郎董漢臣言十事忤閣臣意御史劾漢臣越職言事
希富貴內閣欲因下刑部究主使

上問九卿獨府君白漢臣無罪已內閣復稱

旨傳問府君未對某公目府君曰幸勿違衆議府君厲
聲曰

上因早求言漢臣應

詔言事何罪大臣不能言反罪言者如此心何某大慚
自是恨刺骨居一二日

上幸海澱有輔導

皇太子之命數日病具疏辭內閣欲因之加罪

上不聽第責令回奏而彈者累章迭上然亦不能有所
指

上輒報聞而已比府君回奏事輒已會詹事府復劾府
君薦耿介老不稱職部議革職

上薄其罰削五級留任而忌者愈益怒謀中傷益力日夜叢謀必欲擠之死地人或告府君當防患者或勸府君委曲使人請諸公為解者府君笑曰吾生平以義命自信且年逾六十復何求時抱病杜門伏枕讀朱子文集丹黃點注無異平時

上終察知府君孤介不容於時

特遣御醫診視尋

命改工部尚書是日九卿會議府君入講不至科道即

又劾府君部議降二級調用吏部尚書陳公廷敬爭
曰此者某等失朝從嚴乃奪六月俸何至是然竟不
能得

上復命留任先是府君留溥等代養是年七月不孝沆
來都九月聞府君病不孝溥亦來府君見溥等心頗
喜曰我昨病幾危

上遣御醫診視今漸愈矣吾勢不能去倘不即填溝壑
猶當勉報

君恩顧汝祖母年迫桑榆心中若割奈何不孝溥恐府君心慟乃詭詞應曰祖母近稍健故某來耳府君大喜曰若此母子相見尚有日也居數日奉

命詣潞河勘楠木越三日抵暮歸感風寒微嗽言笑如平時漏下二鼓猶戒不孝溥等曰孟子言乍見孺子入井皆有怵惕惻隱之心汝等養此真心令時時發見久之全體渾然便可上達天德若但依成規襲外貌終為鄉愿無益也又粗問里中事歎曰吾年少交

遊零落盡矣問夜何其乃就寢曰明朝尚會議也不
孝溥等就枕展轉不能寐聞府君嗽聲轉急披衣起
視則喉中有痰疾呼尚能應頃之遂卒嗚呼哀哉天
何不殞滅溥等而奪吾父之速耶家無新衣敝衣以
斂束貼金銅帶加朝服其上朝服緞即

上賜也嗚呼痛哉

上聞遣學士多奇翁叔元以茶酒賜奠命馳驛回籍照
尚書品級

頒賜祭葬皆出自

睿斷非閣臣擬

旨也在京師弔者莫不盡哀扶櫬出都道旁騎者多下馬拱立歎息以為難得所過州縣莫不致祭入睢境紳士父老白衣冠涕泣郊迎者近萬人相與扁其柩前曰忠臣孝子雖兒童婦女莫不唏噓沾襟也府君剛毅介直忠孝原於天性篤志聖學潛脩默證內體諸心外見諸事平易確實不慕高遠克勤小物未嘗

放逸於性命之淵微造化之精奧雖探討窮索而必
以日用倫常為可據於古今之治亂事機之得失皆
綜貫會通而必以誠意正心為有本生平無戲言戲
動好學深思隨事體認天理久之愈益精明遇事坦
然泰然有自得之樂明於審理而不惑利害循分自
盡而不希名譽因事善處而不執成見見義勇為而
不計後功處紛錯心常寧一遇患難神色閒定當幾
立斷而未嘗後時窮達一致而廓然無累自治甚嚴

而待人甚寬宅心平恕而守法不阿遇卑賤而不侮
對權貴而不懾溫然而不可犯侃然而未嘗激故其
居官也未嘗有所與於人而人愛之未嘗有所威於
人而人畏之僚友不言而咸服百姓聞風而革心雖
頑梗黠悍之徒沉迷膠錮之俗莫不令之而即行教
之而輒化間有貪墨之吏強暴之徒不得已見之彈
章加之刑憲者亦未嘗不以府君為仁人也人皆知
府君剛正廉介卓然有壁立千仞之操而其所以感

之而立應既去而民不能忘至誠惻怛痾瘵一體之
心有潛入人而人不覺者世或未之知也生平居無
廣廈出無丈軒家無侍姬食無珍羞吳署多隙地春
月齋生日採食之不厭不孝等嘗從容陳說以為何
太自苦府君色戚然不答不孝等數言之泣然流
涕曰吾非欲儉汝祖母未殉難時日食粗糲我未逮
養故也生平無雜學因先大父病始學醫卜葬地學
堪輿占易以彖象為主常曰易非教人趨吉避凶祇

審理之當否其進退存亡介在幾微間非沉潜玩味不能得也人有一言中理者輒心推遜之且終身不忘聞某處有賢人及文學之士嘗以不見為恨見四方人必問其土俗民情遇節孝孜孜惟恐其沉沒所至興學育才成就為多至人有負已者過則輒忘不留於心在林下時或勸之著書曰學貴日新今之所是異日未必不以為非何敢妄為及再仕雖欲為之不暇也故著書最少所著有洛學編二卷補睢州志

五卷詩文二百餘首公移條約十餘卷未盡行世
今江南常州府奉祀道南書院蘇人特建祠於學宮
有司以時致祭惟謹而紳士復肖像於懷嵩堂中歲
時瞻拜數郡畢至里中從祀鄉賢建特祠奉烝嘗焉
府君生於天啟丁卯十月二十日巳時卒於康熙丁
卯十月十一日卯時享年六十有一配我母馬氏封
恭人州庠員鄉飲正賓諱中駿公女子四長即不孝
溥廉膳生員娶王氏壬辰進士江西提督學政僉事

諱震生公女次濬廩膳生員娶袁氏國子監監生諱
賦諱公女三沆廩膳生員娶宋氏巡撫江西都察院
右副都御史諱榮公女四準娶侯氏辛丑進士中書
科中書舍人諱元棐公女女三長適己丑進士廣東
韶州府知府趙公諱霖吉子監生登先府君卒次適
己亥進士湖廣當陽縣知縣李公諱遙子廩膳生員
中三適廩膳生員張公諱銘鼎子生員淑文俱馬恭
人出孫五扶光聘丁未進士山西懷仁縣知縣崔公

諱九疑孫女廩膳生員諱玳女光裕聘江西提學僉
事王公諱震生孫女候選州同知諱組女傳臚聘當
陽縣知縣李公諱遙孫女監生諱初女俱濬出進賢
聘壬辰進士江南鎮江府海防同知吳公諱淇孫女
監生諱學頤女長真幼未聘俱沆出孫女七長適當
陽縣知縣李公諱遙孫監生初子柒次適戊戌進士
戶部右侍郎王公諱遵訓孫考城縣儒學教諭諱光
臯子生員肇煒三許字庚戌進士原任內閣中書王

公諱錞孫監生諱涵子采俱溥出四五六七幼未許
字四五七濬出六沆出康熙二十八年十月四日奉
寔於州城東南棘故城

賜葬新阡不孝溥等苦由昏迷中和淚濡毫語無倫次
惟冀大人君子哀而賜之銘感且不朽

墓誌銘

長洲汪 琬撰

康熙二十六年冬十月十一日工部尚書睢州湯公
斌薨於位年六十有一公之病也

上遣御醫診視及薨又

遣滿漢學士漣酪奠公柩

命其孤馳驛護公喪歸

詔予祭葬如故事訃聞於吳先是公嘗駐節吳中去逾
年而吳人追思不忘為公建生祠於學宮至是會哭
祠下者數千百人悉號慟失聲有識謂數百年來自
周文襄王端毅兩公而外巡撫未有如公者也而前
公巡撫江南者方柄用勢燄張甚忌公聲望出已上

又嘗以事徵賄鉅萬於吳有司有司議率民財以應
公禁不許遂銜公刺骨公既去吳還

朝

上眷注益厚忌者日夜用蜚語讒公於

上前必欲擠諸死地賴

上神聖稔知公無他公故得保功名以終殆公捐館舍

未逾月而忌者事敗踉蹌出都門凡都人士訖吳中

父老子弟咸指斥夫已氏姓名戟手相詬詈以其媒

蝎公故也由是朝野公論始大白而公之志不獲伸於地上庶幾其伸於地下矣越明年諸孤將卜葬州東南黃岡之阡先期遣使以書及行狀來請銘琬嘗與公同為史官又辱知交最深乃核其世次官闕事行之實序而銘之謹按公字孔伯別自號荆峴晚又號潜菴先世由滁州之來安以軍功為金川門世襲百戶其後調睢陽衛遂家於睢後又以功世襲指揮僉事五傳至明威將軍岷州衛守備諱易者公高祖

也。曾祖趙城縣丞諱希范，祖州學生諱敏，考州學生諱祖契，以公賢封中憲大夫、陝西按察使、副使。妣趙恭人李自成之亂，恭人被執，罵賊不屈死。琬嘗文其祠堂之碑，繼母軒太恭人。公少不好弄，稍長，益以學自奮，於書無所不讀，而尤好習宋諸大儒書。年甫踰冠，舉順治戊子科鄉試。明年會試中式，越三年成進士。改弘文院庶吉士，授國史院檢討。時方議脩明史，公疏言：「宋史脩於元至正而不諱，文天祥、謝枋得。」

之忠元史修於明洪武而亦並列丁好禮布延布哈
之義

陛下應天順人而元二年間前明諸臣猶有未達天心
抗節以死者似不可槩以叛書乞頒寬宥之

詔俾史官得免瞻顧則諸臣幸甚政府見公䟽不悅
世祖召至南苑慰勞再四於是聲譽大著居無何

詔選翰林官任監司俾習知民事以需大用公與在選
中出為潼關道副使於是中原初定

王師方下滇蜀關中當用兵孔道征調往還者旁午
頗驕橫不戢民間苦之加以差徭煩重相率竄走
山谷公戒屬吏毋科取民財毋妄用驛夫兵來吾
自應之已而駕馭有法來者悉奉約束惟謹不三年
流民歸復業者踰數千戶關中多盜公嚴行保甲法
量地遠近俾民間各設鉦鼓砲石盜至即以次傳警
頃刻數百里近者赴救遠者各扼要地盜故不敢發
發亦輒得所屬遂大治陞嶺北道叅政公治所在贛

贛四省上游地穹山深箐大盜窟穴其間時時出肆
焚劫值海寇犯江寧贛人騷然各洶洶思亂公密陳
方畧於上官擒盜魁一人誅海上謀者一人及城中
姦民與盜通謀者又一人而貫其餘黨贛人以靖上
官方倚公如左右手而公念其父中憲公竟乞假歸
矣自是里居將二十年性故廉介補衣素食怡然自
適官吏不知公者或相凌侮亦置不校也中憲公服
闋聞孫鍾元先生講學蘇門賃驢往受業門下每質

所疑先生亟稱之歸而所得益遠所行亦益力屹然
推中原巨儒舉朝賢士大夫交口稱說以薦舉復起
御試甲等補翰林院侍講與琬輩同入史館充日講起
居注官尋轉侍讀出典浙江鄉試還充明史總裁官
既又直

經筵纂脩

兩朝聖訓公在

上前進退翔雅敷陳詳盡深契

上意超擢內閣學士兼禮部侍郎遂以右副都御史巡撫江南陞辭之日

賜鞍馬綵緞白金五百兩繼

賜御書三軸諭曰展此如見朕也其眷注多類此江南故習奢侈而吳中尤甚服食玩好多不節又喜蒲博諸戲歲時婦女爭炫粧冶服嬉遊山水間以為常而市井無藉子率尚拳勇用鬪毆恐愒民財事急即恃勢豪為囊橐不可究詰其尤無良者則鬻身旗下借

以脩故豐公悉禁止不少貸素多淫祠事楞伽山五
通神尤嚴甚寒劇暑載鼓吹牲帛往賽禱者駱驛相
繼奸巫淫尼闖入人閨閤競相煽惑吳人以其益困
公廉得其狀躬至五通祠取土偶投諸湖中衆始大
駭久而又大悅服為政簡靜然下令期於必行賊吏
壺胥悉搖手屏足相戒不敢犯重脩泰伯祠朔望必
往躬謁又謁范文正公及周忠介公祠以為衆勸數
親詣學宮命諸生講孝經俾幼穉悉得列坐以聽拊

循細民若惟恐傷之者吳俗自是大變雖窮村僻壤
莫不感頌其政里巷因公之姓至以諺語呼公清湯
云公屢上疏訴吳人疾苦請改竝徵積逋為分年帶
徵請捐十八十九兩年災欠請除邳州版荒田賦又
請捐明神宗朝所加九釐餉又請免淮揚徐水災諸
州縣賦部議或從或否而公初未嘗憚煩也二十五
年春有

詔擢禮部尚書掌詹事府事吳人空一城痛哭叩轅門

留公不得則塞城闔阻公行又不得則遮道焚香以送者亡慮億萬人踰千里不絕及公渡淮乃已忌者覘知之愈益憾公

上遇公厚每會推會議必問湯某云何公亦感

上殊遇凡是非可否必侃侃正言不嬰不撓忌者方力謀中傷顧未有以發而會五官臺郎董漢臣上書言十事語侵內閣或言漢臣本不知書有代草者御史受風指深丈劾漢臣內閣擬

旨下部究主使

上乃命集九卿更議衆咸欲抵漢臣罪忌者逆沮公幸
勿倡異議公曰彼應

詔言事耳大臣不言將愧謝之不暇而忍周內耶因舉
手自指心曰如此中何忌者大慚且憤所以誣讎公
萬端且摘公去吳時教令中語指為市恩干譽於是
公已患病竟為讒言所中有輔導

皇太子之命公以病辭忌者欲藉是加罪

上不聽僅令回奏遂嗾廷臣交章劾公又不聽後先報聞而已先是公病思歸自以新被讒不敢

請告乃薦前道臣耿公介侍

皇太子講冀以自代耿公老儒迂謹與舉朝不相得復嗾廷臣劾公所薦非是部議革職

上特寬其罰鐫五級留任猶不愜忌者意羣謀中傷益急公適聞太恭人病乃上疏乞暫歸省

上遣使齎手詔慰諭且欲賜第京師命公迎養公叩頭

言老母萬不能來奏上有

旨不允公去當公之乞歸也忌者宣言

上怒將隸公旗下得

旨猶秘之急召詣閣中公以病扶挾上輿道路譁傳湯尚書入旗矣皆泣下而蘇松諸郡客都下者數百人竝集鼓廳門將擊登聞鼓訟寃聞公還始散是時徵上保全公禍幾不測矣已而

皇太子見公羸瘠大驚曰公果病至此耶越數日

命改工部尚書忌者勢不得騁更謀興大獄羅織公罪
不數日而公病遂革方禍急時或勸公委曲請諸公
居間俾稍解者公哂曰吾義命自安六十老翁尚何
求哉或又勸公發忌者陰事以紓其禍公又曰吾有
老母在未敢以此試也故士大夫咸以為難配馬恭
人子男子四曰溥曰濬曰沆皆州學生曰準子女子
三適國子監生趙登諸生李中張淑文孫男五孫女
七公平居潛心聖賢之學其於性命之淵微造化之

精奧無所不探而一以誠正為本於古今之治忽事
會之得失無所不綜而一以忠孝為先所撰著洛學
編一卷補睢州志五卷詩文若干卷琬前在史館出
入必偕藉公淬礪講貫者甚至不知公於程朱何如
以視真魏許姚諸儒則當出其上矣琬方請急亦嘗
諷公以歸未幾而公欲薦琬為明史副總裁自江南
被

召又欲以宮寮薦琬固謝不可且曰願與公同其退不

願與公同其進也琬長於公三歲訖今猶覩顏人間
而公不可作矣每一憶公輒淚涔涔被面何忍執筆
銘諸然琬雅以直諒為公所許倘不能白公之志而
暴其受讒始末以示天下後世不幾負我死友哉銘
曰

猗湯屢遷肇興睢陽逮公之身彌久益昌為國純臣
為世儒碩道禰洛闕志宗稷益維我

世祖拔公妙年起家內院付以大藩翩然引身潛蟄閭

里

世祖儲之遺我

聖子入登侍從出拊江淮

帝念疲氓往哉汝諧再期政成遽蒙前席構彼含沙伏
機以射何交之泰而命之遭屢習於坎出險斯艱風
雨露雷罔非

帝德

帝心簡在寧虞叵測生榮歿哀公奚憾焉天可必乎人

定勝天黃岡之丘不騫不圯瘞是銘詩以俟良史

祭湯夫子祠文

門人王廷燦

粵維嵩嶽代生哲人周多吉士生甫及申耆英宿德
宰相元臣汝南論道秘閣傳經淵源溯接惟公絕倫
初構竒剝寇虜廬焚貞母罹難誓捐厥身含悲厲志
嚴命是遵流離東浙備歷艱辛依棲山窟猛虎為鄰
夜攻墳史彼嘯我呻採薇作飯掃葉為薪或憐餽食
固却且嗔義不苟取自昔諄諄幸逢

聖代得返里闈文明肇啟應運攀鱗南宮已奏不肯垂
紳吾斯未信強學席珍多文為富志非飽溫學優則
仕乃達

紫宸校書虎觀藜火夜昕古今典故縷晰羣分旋膺旻
旒藩守西秦供輸約法安集懷仁瘡痍頓起驕悍咸
馴繼遷南贛撫叛綏循靜弭風鶴智掃烟塵江南半
壁賴以寧氛劬勞報國輒念老親陳情屢表感動蒼
旻去官就養菽水非貧五車博覽三徑叢埋匪耽巖

壑實慕昏晨東山久卧屬望彌殷徵書驟下敦促續
紛重登天祿

經筵備陳學惟誠正治先耕耘

帝念東南賦重民屯移風易俗非公莫掄澄清攬轡至
便理輪豺狼是問芻蕘是詢暑不張蓋寒不惟茵食
惟茶薺飲則冰尊正已率屬墨吏羣奔屏輿下士道
義知尊吳民好訟劍口鋒脣公惟教化告語閭閻吳
俗好巫載鬼號神公惟正直投諸水濱利興弊剔刑

簡政均積澆仍陋一旦還淳時惟曾教急藉疑承去
我父母師保青振干戈羽籥輔導殷勤詩書禮樂恭
敬溫文懋成

睿德寵錫彌頻爰陟司空夙夜惟寅心勞力憊一旦忽
淪吳民悲慟罷市停昫公之德業實比陽春敷天均
被南國尤欣公之節操有似松筠窮且益堅顯則愈
伸公之立行一本忠誠求志行義移孝事君公之學
道遠紹闕閩祇期身體不事諛聞廷燦不才荷公陶

甄生我成我欲報靡因今來承之實公棠陰勿剪勿
伐謳誦猶新俎豆禋祀永矢不泯始知直道乃在斯
民儀型匪遠愧疚彌急拜公祠下來格來歆

祭座主湯潛菴夫子文

仁和受業沈佳

嗚呼道歷千載聖遠言湮不有哲人孰繼其傳繫惟
夫子鍾嵩嶽之靈秀紹伊洛之微言力闡乎天人之
秘識參乎造化之權以一心而為百代斯文之寄以

一身而為斯民社稷之攸關方年少而登巍科躋臚
仕不數載而遂高蹈乎林泉及再出而應徵召也內
侍

講幄外撫吳會皆著其蹇蹇匪躬之節而為

聖主咨訪之惓惓繼拜司空之命方簡畀以大任夫何
竭忠盡瘁竟溘焉館舍之是捐嗚呼夫子之心昭揭
若青天白日夫子之行和霽若霽月春溫夫子之望
尊嚴若北斗泰山而其任道之勇也不以一己之進

退為憂喜每以一夫不獲其所為恥不以一善成名
自足常以望道而未見為慚其律身之嚴也凜兮若
秋霜之烈毫無私欲之為累湛然如長江之濯而人
不得以私事相干其與人之和也儼然望而起肅即
之如坐乎春風秩然言之有條使人皆足厭飲乎其
間故其論學則大中至正絕無門戶之同異惟宗乎
洙泗濂洛為正傳其述經則審端尋緒沉潛涵泳絕
無意見之偏私惟闡乎六經四子為淵源其肆力乎

文章也旁搜遠紹舍英咀華彙萃百家之旨足以廻
狂瀾而摭拄乎中天至於教人之方以躬行為要以
涵養真心為宗因人而施務循聖人之成法而不徒
襲乎簡編其用功之密閤脩默識體認天理雖當事
機之紛沓而此心寧一常覺其不愧不作而恬然於
易以象占為主於春秋以經文為正於詩書禮樂則
有論述皆以經解經正大詳明日新之學發乎心得
而不事穿鑿乎陳言洛學有編郡乘有志而國史之


輯則期於確核至厯法象緯與地下及醫卜之書靡不為之究晰而精專是以德業事功超軼乎百代而大節偉行彪炳乎人寰若夫孝友篤於家庭誠信孚於僚友仁慈洽乎民物自童穉以迄強壯自窮居以逮仕宦無一事不可告人而質諸天雖細微之事步履之間有見其暉吉之流露而好善之誠惟恐不及疾惡之剛若將浼焉又發乎至性之醇全擬其遇事明練有更生稚圭所未及而立心正大則與彥國君

實相參其志操澹泊有類乎諸葛忠武而造詣純粹
殆合乎明道伊川斯真

聖朝之名世而得統於儒先者也佳荷蒙甄拔久侍經
帷令季子準命從佳遊愧難報夫埃涓思立雪之有
日未罄乎仰鑽步趨之力忽聞曳杖之訃有失聲於
山頽木壞之奚瞻嗚呼易名之典崇祀之儀方有俟
乎

天恩之寵錫而仰止靡從依歸無所又不勝其寢門私

慟之流連然而不忘者德不朽者功不可泯者史冊
之垂遠克繼序者孝子之象賢夫子其亦可以浩然
含笑於九原嗚呼尚饗



湯子遺書附錄